

■ CONVIVENZA

Moscau simpel!

DA PIEDER CAMINADA*

Jau n'hai puspè ina giada betg pudì laschar star da leger ils commentaris tar in post sin facebook. L'impuls m'ha dà in enconuschent ch'era s'exprimì en la rait a moda irritanta davart Greta Thunberg. Ed essend che jau n'aveva da far nagut pli perdert hai jau legì il thread cun ils commentaris plain odi – cun smirvegl creschent.

Be il fatg che Greta Thunberg vegn tgemblada cun commentaris plain odi en l'entir mund – frappantamain surtut da gliend pli veglia – mussa ch'ella ha tutgà sin il viv cun ses placat renumà «Skolstrejk för Klimatet». Per quests represchentants dal «hate speech» che na differenzieschan betg gugent è Greta Thunberg la culpa da tut. La culpa ch'ìls giuven dad oz possedan in telefonin. La culpa ch'ìls viagian per emprender d'enconuscher il mund. La culpa ch'ìls vegnan transportads da lur geniturs en in SUV a scola. Atgnamain la culpa per tut quai che va a travers sin noss mund. Dasperas avain nus ch'essan (presumadamain) amez la vita fatg tut il pussaivel per garantir in'existenza senza quitads a la giuventetgna d'ozendi. E per quai duesan quels giuvenots ch'èn anc verds davos las ureglias sa mussar engraziaivels.



Per mai è il punct il pli bass en il thread da facebook menziunà stà quel user che ha scrit ch'ì na saja betg surpudent che Greta Thunberg n'haja nagina idea da nagut. Tgi che marieschia la scola ils venderdis per protestar cunter la midada dal clima, quel na posia betg daventar perdert. L'applaus en la rait è stà garantì ad el. Tgutg be che strusch in dals applaudents e stà abel da scriver duas frasas pli u main senza sbagls. U ch'els han era marinà la scola pli baud u che...

Dal reminent, totalmain nov n'è quest odi nunfritgaivel tranter las generaziuns betg. Cura che jau era en la vegliadetgna da Greta Thunberg crititgava jau er ils creschids. E quai betg mo cnap. A mai na plascheva betg lur conservativissem, jau ma grittentava da la morala dubla fitg derasada, da l'aviditad da posseder adina anc daplì bains materials – ed jau na vuleva definitivamain mai daventar tuttina sco els. Sa chapescha n'era jau betg

persul. Quasi tuts mes collegas ticcavan sco jau. E nus ans sentivan fermes ed eran persvas da pudair meglierar il mund.

Meglierar il mund? «Cumpra in bigliet per Moscau – ma per plashair Moscau simpel», ma faschevan tscherts creschids adina puspè da savair. Pertge che quels che crititgavan las relaziuns da qua eran en il temp da la Guerra freida automaticamain communists e vegnivan gugent supplitgads da bandunar la Svizra. L'avantatg da lez temp era ch'ì deva cun Moscau almain in lieu (simbolic) nua ch'ìns pudeva bandischar contemporans malvesids.

Oz na pon ins gnanc pli recumandar l'Arctica criva sco lieu d'exil a Greta Thunberg. Pertge che là scuntrass ella inevitablamain precis ils creschids ch'insulteschian ella malmain en la rait ed en brevs da lecturs. E ch'èn gist vidlonder d'observar ils davos urs polars selvadis giu d'ina cruschera ch'emetta tonnas substanzas nuschaivlas, avant che...

* Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castrisch.

La convivenza da las linguas e culturas en il Grischun – quai è il tema da las columnas che cumparan sut il titel «Convivenza» e che vegnan publicadas mintga glindesdi en las gasettas Südostschweiz e La Quotidiana.